

Program Penerangan Cuepacs Berjaya Tingkatkan Pemahaman Penjawat Awam Tentang CBP

Bernama

5 Mei, 2014

KUALA LUMPUR, 5 Mei (Bernama) -- Penjawat awam, menurut Kongres Kesatuan Pekerja-Pekerja Dalam Perkhidmatan Awam (Cuepacs) kini semakin memahami kepentingan dan rasional di sebalik pelaksanaan Cukai Barang dan Perkhidmatan (CBP).

Menurut Presidennya, Azih Muda, ia merupakan hasil daripada program penerangan CBP yang giat dijalankan oleh Cuepacs sejak tahun lepas.

"Sehingga hari ini Cuepacs telah melakukan program penerangan CBP di beberapa buah negeri, antaranya di Kedah, Sarawak, Terengganu dan Kelantan, kami akan melakukan program yang sama di negeri-negeri lain dalam masa terdekat," katanya ketika dihubungi Bernama Isnin.

Katanya, pada mulanya memang terdapat penjawat awam yang keliru dan risau CBP akan menyebabkan peningkatan harga barangan keperluan harian, selain maklumat mengenainya amat sedikit dan terpengaruh dengan maklumat yang tidak tepat di laman sosial.

"Bagaimanapun setelah beberapa program penerangan dijalankan, kebanyakan mereka mula memahami kepentingan dan kelebihan pelaksanaan sistem cukai baharu ini," katanya.

Beliau berharap dengan penerangan yang diberi, penjawat awam dapat menyalurkan maklumat yang betul berkaitan CBP kepada anggota masyarakat bagi mengelakkan mereka terpengaruh dengan maklumat yang sengaja dipesongkan oleh pihak tidak bertanggungjawab.

"Ini adalah untuk menyahut saranan Perdana Menteri Datuk Seri Najib Tun Razak yang mahu kakitangan kerajaan meningkatkan penerangan mengenai CBP agar rakyat tidak keliru dan terus ditipu oleh pihak tertentu," kata Azih.

Najib semasa membentangkan Belanjawan 2014 pada Oktober tahun lepas

mengumumkan cukai tunggal CBP pada kadar 6 peratus akan dilaksanakan pada 1 April tahun depan bagi menggantikan Cukai Jualan dan Perkhidmatan sedia ada yang berkadar keseluruhan 16 peratus.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1035895>